

## **Zajednička izjava kopredsjedavajućih Snježane Novaković-Buršać (Parlamentarna skupština Bosne i Hercegovine) i Romea Franza (Evropski parlament)**

**31. oktobar 2023**

*Nakon trećeg sastanka Parlamentarnog odbora EU-Bosna i Hercegovina za stabilizaciju i pridruživanje 30. i 31. oktobra 2023. Kopredsjedavajuća Snježana Novaković-Buršać (Parlamentarna skupština Bosne i Hercegovine) i Romeo Franz (Evropski parlament) izjavili su:*

Upravo smo uspješno završili treći sastanak Parlamentarnog odbora za stabilizaciju i pridruživanje EU-Bosna i Hercegovina, skoro osam godina nakon njegovog prvog sastanka ovdje u Sarajevu, u novembru 2015. Imali smo intenzivne, iskrene i plodne diskusije o odnosima EU-Bosna i Hercegovina i stanju ispunjenja 14 prioriteta navedenih u Mišljenju Komisije o zahtjevu Bosne i Hercegovine za članstvo u Evropskoj uniji. Za naše dvije delegacije bilo je veoma važno da budu u mogućnosti da direktno komuniciraju o nizu pitanja, kako u formalnom tako i u neformalnom okruženju. Mnogi članovi delegacije Parlamentarne skupštine Bosne i Hercegovine koji su ujedno i članovi Zajedničke komisije za evropske integracije također su imali priliku prošle sedmice učestvovati na nekoliko sastanaka u Evropskom parlamentu u Briselu.

Ovaj prvi punopravni sastanak Parlamentarnog odbora za stabilizaciju i pridruživanje EU-Bosna i Hercegovina nakon usvajanja Poslovnika u junu 2021. dolazi u ključnom trenutku. Sljedeće sedmice, Evropska komisija će objaviti svoj paket proširenja za 2023. s nizom izvještaja zemalja koji će po prvi put uključivati izvještaje o Ukrajini, Moldaviji i Gruziji. U slučaju Bosne i Hercegovine, nadamo se da će naš rad proteklih dana dovesti Evropsku komisiju do zaključka da je ključni prioritet broj 3 ispunjen. Odlučni smo da ne izgubimo vraćeni zamah u našim međuparlamentarnim odnosima i da udahnemo novi život parlamentarnoj dimenziji Sporazuma o stabilizaciji i pridruživanju između EU i Bosne i Hercegovine. Stoga smo se već dogovorili da održimo četvrti sastanak našeg Odbora u martu 2024. godine u Strazburu.

U decembru 2022., Bosni i Hercegovini je dodijeljen status zemlje kandidata, odluka koja se temeljila na novoj geopolitičkoj realnosti, a ne na opipljivom napretku koji je Bosna i Hercegovina ostvarila na svom putu prema EU. Priznajemo ograničen napredak prethodnih mjeseci u postizanju ciljeva zacrtanih u Mišljenju Evropske komisije i prepoznavamo potrebu za nepokolebljivom predanošću i zrelim fokusom svih donosioca odluka o evropskim integracijama Bosne i Hercegovine, u skladu sa političkim konsenzusom. Eventualna odluka u decembru ove godine o otvaranju pristupnih pregovora svakako bi dodatno ohrabrila Bosnu i Hercegovinu da marljivo radi na stvarnom otvaranju prvih poglavlja. To bi također bio dodatni dokaz odlučnosti EU da pruži prioritet proširenju uz razumijevanje da pitanja EU integracija pojedinačnih zemalja ostaje izazovan poduhvat zasnovan na zaslugama. Razumijemo da će odluka o početku pristupnih pregovora zavisiti od opipljivog i konkretnog napretka koji Bosna i Hercegovina napravi godinu dana nakon dobijanja statusa zemlje kandidata, u skladu sa Mišljenjem Evropske komisije o zahtjevu Bosne i Hercegovine za članstvo u Evropskoj uniji.